



Prihvaćen prijedlog sarajevskog Tužilaštva

OSUMNJIČENI ZA ŠVERC 11 KG DROGE OSTAJU IZA REŠETAKA

Nikola Nešković, Jovo Golo, Jasmin Sijamić, te Aleksandar Ivković, koji je početkom godine zbog istog krivičnog djela osuđen na četiri godine zatvora, uhapšeni na Ilidži
• Sabrija Avdagić uhvaćen nekoliko dana kasnije

Kantonalni sud u Sarajevu produžio je pritvor Nikoli Neškoviću (1989), rođenom u Trebinju, nastanjenom u Bileći, Jovi Goli (1964), rođenom u Metkoviću, nastanjenom u Trebinju, Aleksandru Ivkoviću (1985) iz Bileće, Jasminu Sijamiću (1987) iz Sarajeva, te Sabriji Avdagiću (1994), rođenom u Slapu, a nastanjenom u Sarajevu, koji se sumnjiče da su kao članovi organizovane kriminalne grupe švercovali drogu.

Pretrasi

- Pritvor je osumnjičenim produžen za još dva mjeseca, potvrdio nam je Alem Hamzić, portparol sarajevskog Tužilaštva.

Slijedom ove sudske odluke osumnjičeni u pritvoru mogu ostati do 8. jula ili nove odluke suda.

Nešković, Golo, Ivković i Sijamić su, podsjećamo, uhapšeni 8. aprila u akciji sarajevskog Tužilaštva i policije na području Ilidže, gdje je tom prilikom zaplijenjeno 11 kilograma marihuane.

Tada su, kako smo već pisali, pretreseni osumnjičeni te vozila koja su koristili neki od njih, ali i Sabrijina majka Fatima Avdagić.

Tada su kod Neškovića nađena i oduzeta dva mobitela i određena suma novca koji najvjerovatnije potiče od prodaje droge, od Gole su oduzeti 10 kilograma marihuane i mobitel, od Ivkovića dva, a od Sijamića jedan mobitel, dok su policajci kod Fatime Avdagić našli kilogram marihuane.

Također je zaplijenjeno i 10-ak hiljada KM koje, najvjerovatnije, potiču od preprodaje droge.

Vahid Ćosić, komesar MUP-a KS-a, na konferenciji za novinare tada je rekao da je hapšenju pretihodno operativni rad na prikupljanju informacija i podataka, a vrijednost zaplijenjene droge tada je procijenjena na oko 150.000 maraka.

Nakon saslušanja u policiji, Fatima Avdagić je puštena, za njenim sinom je raspisana potraga, dok su preostala četvorica osumnjičenih predana Tužilaštvu, te nakon saslušanja i pritvorena.

Kantonalni sud tada je odredio pritvor Neškoviću, Goli, Ivkoviću, Sijamiću, ali i Avdagiću. Njega su, kao što je poznato, 16. aprila uhapsili službenici Odjeljenja za borbu protiv zloupotrebe opoj-

nih droga Sektora krim-policije MUP-a KS-a, te je on sproveden u pritvor sarajevskog KPZ-a.

Akcija Šetač

Osumnjičeni Ivković je, podsjećamo, u januaru presudom Suda BiH osuđen na četiri godine zatvora, nakon što je sa Tužilaštvom BiH sklopio nagodbu te priznao krivnju za organizovani kriminal, odnosno krijumčarenje droge, za što se tereti i u ovom predmetu.

Ivković je, naime, sredinom aprila 2013. bio jedan od uhapšenih u akciji kodnog naziva Šetač, koju je SIPA izvela uz podršku MUP-ova RS-a, HNK-a i KS-a. Ta grupa se teretila da je od 2010. do 2013. godine u više navrata krijumčarila na desetine kilograma skanka, heroina i kokaina sa područja Albanije i Crne Gore u BiH, te dalje prema teritoriji Hrvatske, te tako "zaradila" više stotina hiljada maraka. Novac dobijen od prodaje droge članovi su kasnije ulagali u kupovinu luksuznih automobila i skupocjenih predmeta.

L. S.



Sa privođenja osumnjičenih u sarajevsko Tužilaštvo